

KONTROL MOZIOA

Oleta-Pikabea auzunearen irisgarritasuna eta segurtasuna hobetzeko plan bereziari buruzkoa

EH Bildu udal taldeko zinegotzi Zigor Etxeburua Urbizuk, Udaltzaren Organo Araudiko 98. artikulua oinarri hartuta, mozio hau aurkezten du Udaltzaren azter dadin. Mozioa 2021eko maiatzaren 17an Gune Publikoen batzordean aztertutako interpelazioaren ondorioa da.

JUSTIFIKAZIOA

Oleta auzuneak pairatzen duen irisgarritasun arazoa ezaguna bezain larria da, orografia maldatsua baitu. Urteotan, hainbat konpontze lan egin badira ere, izan jabe pribatuek beraiek edo Udalak eginak, azterketa bakarra egin da auzoa ikuspegi orokor batez aztertzeko (oinezkoek auzoen artean egiten dituzten fluxuak aztertu, irisgarritasun egoeraren argazki osoa egin...). Lan hori Berdintasun Sailak egin zuen, 2019an, auzoan dauden puntu kritikoen harira. Besteren artean, Oletako trenbidepeko tunela eta auzoko eskailerak aztertu ziren. Edonola, Udal Gobernuak ez die jarraipenik eman lan horretan jaso ziren irtenbideei.

Hain zuzen ere, auzotik igarotzen den Topoaren trenbide zatiaren etorkizunaren inguruan ere galdetu genion Gobernuari. Altxa-Galtzaraborda saihezbideko lanak urte amaieran hasiko dira, eta horiek amaitzean (2026), Herrera eta Pasaia arteko trenbideak ez du egitekorik izango, eta lur publiko horiek libre geratuko dira. Beraz, Oletak aukera bat izan dezake hor trenbidepeko tunelaren irisgarritasun arazoari irtenbidea emateko. Udal Gobernuak erantzun zuen ETSrekin aztertuko duela.

Auzune honek badu beste aldagai korapilatsu bat: etxarteak jabetza pribatukoak dira, hein handi batean. Horrek eta auzotarrek auziari konponbidea elkarlanean topatzeko modurik ez ikusi izanak ekarri du Donostiako Udalarri laguntza eskatu izana. Badira gutxienez hamar urte Pikabeako auzotarrak irtenbide eske ari direla, eta 2007-2011 eta 2011-2015 agintaldietan zenbait urrats egin baziren ere, bizilagunak zahartzearekin batera, arazoa larriagotzen joan da. 2020ko aurrekontu egitasmoan, Udal Gobernuak zenbait aldaketa adostu zituen EH Bildu udal taldearekin. Horrela, Udaltzarrak onartutako 2020ko aurrekontuetan jaso zen 70.000 €ko diru-sail bat, 643.03 zenbakiduna, Oleta-Pikabea auzunearen irisgarritasuna hobetzeko eta segurtasuna handitzeko plan berezia egiteko.

2020an, ordea, Udal Gobernuak gelditu egin zuen 2020ko aurrekontuaren exekuzioa, SARS-CoV-2 birusagatiko krisiak eragindako kalte ekonomikoen aitzakiatan, eta aurrekontuan jasota zeuden hainbat egitasmo gelditu egin ziren, tartean Pikabea-Oletako auzunearen irisgarritasuna hobetzeko plan berezia egitea. Geroztik, birritan galdetu dio EH Bilduk zinegotzi ordezkariari zergatik Udal Gobernuak ez duen abiatu Oleta-Pikabea auzunearen irisgarritasuna eta segurtasuna hobetzeko Plan Berezia zehazteko prozesua. Otsailean, zinegotziak hitzeman zuen EH Bildurekin adostu zen zuzenketa gauzatzeko aukera aztertuko zuela. Geroztik, ordea, ez dugu ezeren berririk izan.

EH Bildu talde politikoa

Grupo político EH Bildu

Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus -

Horregatik, udal batzordean berriz ere galdetu genion Gobernuari Plan Berezia zehazteko prozesua abiatzeko asmorik ote duen. Zinegotzi ordezkariak adierazi zuen Udal Gobernuak baduela egiteko asmoa, baina ez zuen horretarako eperik eman.

Egoeraren premia eta dituen korapiloen nolakoa ezagututa, EH Bilduren udal taldeak beharrezkoa ikusten du lehenbailehen hastea Oleta auzoaren irisgarritasuna eta segurtasuna hobetzeko Plan Berezi hori zehazteko lanak.

Horiek horrela, honako hau da behean sinatzen duen zinegotziak aurkeztutako KONTROL MOZIOA:

KONTROL MOZIOA

- 1.- Donostiako Udalbatzak hertsatuki eskatzen dio Udal Gobernuari lehenbailehen abiatu dezala Oleta-Pikabea auzunearen irisgarritasuna eta segurtasuna hobetzeko Plan Berezia zehazteko prozesua, eta aldi berean, Plan Berezia zehazteko unean, kontuan izan ditzala Berdintasun Sailak Oletarako proposatutako irtenbideak.
- 2.- Donostiako Udalbatzak hertsatuki eskatzen dio Udal Gobernuari antola dezala parte hartzeko prozesu bat auzotarrei zuzendua, irisgarritasuna eta segurtasuna hobetzeko Plan Bereziaren nondik norakoen inguruan azalpenak emateko, eta, oro har, auzotarrek dituzten kezkei eta beharrei erantzuteko.

Donostian, 2021eko maiatzaren 20an

Zigor Etxeburua Urbizu
EH Bildu udal taldeko zinegotzia